

«Be cuminaivel essan nus fermes»

Uniun grischuna d'artisanadi e mastergn



Viktor Scharegg (a san.), il nov president da l'uniun, cun Baseli Werth, il vicepresidente.



Sa drizza a la raspada è er cusseglier guvernativ Marcus Caduff.

FOTOS G. N. STGIER

DA GION NUTEGN STGIER / ANR

■ **Dapi venderdi ha la pli gronda associaziun professiunala dal Grischun in nov president. Quai è Viktor Scharegg, l'um da 56 onns. El veglia cuntunt s'engaschar per interpresas pitschnas e mesaunas. Il premi d'innovaziun ha retschet Andreas Zindel.** Da las numerusas uniuns e federaziuns che nus avain en noss chantun è segir l'Uniun grischuna d'artisanadi e mastergn ina da las pli impurtantas. Quell'uniun cun passa 6000 commembers che derivan da 63 secziuns ed associaziuns professiunalas è il motor da l'economia grischuna. A Cuira ha già lieu la radunanza da delegads cun 120 preschents e bunamain 70 giasts da la politica, da l'economia e dal turissem.

L'uniun en malencurada

Manà la radunanza da delegads ha il medi *Baseli Werth*, il vicepresidente da l'uniun. En ses pled da bainvegni ha el chattà plets profunds e da cor per Herbert Stieger, il president en uffizi, ch'è mort avant quatter mais causa da la malsogna da cancer. Werth ha ditg ch'el haja dastgà accompagnar il president barmier dapi l'entschatta da sia diagnosa da cancer. El sco medi haja bain già ina pitschna speranza che ses ami e president da l'uniun vegnia danovamain tar forzas e possa star anc intgins onns al timun da l'uniun, in'uniun ch'el aveva fitg a cor. In di haja Stieger lura ditg: «Char Baseli, cun mai vai vers la fin.» Quel di haja er el gi d'acceptar quel destin e curt suenter già da prender per adina cumià da l'um malsau che saja stà bler daplì che be in pre-

sident activ e popular, na, er in bun ami, ha punctuà Werth e quai cun ina vusch commuentada.

Chattar soluziuns

Cun plaschair ha lur Werth preschentà Viktor Scharegg da Cuira e mainagestiu d'in manaschi per tecnica d'edifizi sco candidat per surpigliar l'uffizi da president da l'uniun. El saja interpredider cun corp ed olma, in um cun in pensar cumplessiv, ina persuna cun buns contacts tar l'economia e la politica ed in mastergnant fitg activ, ha menziunà Werth. Cun applaus han ils preschents lura elegi Scharegg sco nov parsura da l'Uniun grischuna d'artisanadi e mastergn. El vegnia cuntunt a s'engaschar per interpresas pitschnas e mesaunas e cuntunt impedir che gronds travagls surpiglian manaschis

pitschens. El na saja betg in um da speranza ed animaziuns, dentant ina persuna che tschertgia pli gugent soluziuns, ha punctuà Scharegg. L'economia dovra bunas cundiziuns da basa, nagina pressiu da pretschs e lura er ina politica che saja averta envers il commerzi e l'industria. A la fin da ses pled ha il nov president ditg: «Be cuminaivel essan nus fermes.»

Quatter puncts

Cun plaschair portia el ils salids da la regenza, ha ditg cusseglier guvernativ *Marcus Caduff*. Il Lumnezian ha ditg als preschents da cuntinuar cun la buna lavur, ina lavur che saja exemplarica per l'economia. Il chantun, quel tschertgia gugent il dialog, segnia per bunas cundiziuns fundamentalas e saja er pront da star a disposiziun sco cussegliader. Caduff ha fatg at-

tent a quatter puncts che sajan da gronda muntada ed impurtanza per avair er en il futur ina buna economia en il Grischun. Quai sajan: L'innovaziun, la digitalisaziun, avair persunas qualifitgadas e lura er il svilup regional. Anc na sajan cuntunt tar il svilup regional betg cuntanschidas las finamairas messas cun introducir ils svilup-paders regionalas, ha menziunà Caduff. *Jürg Michel*, il directur da l'Uniun grischuna d'artisanadi e mastergn, vegn ad ir en pensiun en in onn. Il fil cotschen en ses pled en stadas las elecziuns naziunalas. Michel ha appellà als preschents da be dar la vusch a candidats e candidatas da las partidas burgaisas. A la fin da la radunanza da delegads è *Andreas Zindel*, il patrun da la Zindel United, Maiavilla cun 400 emploiads, vegnì undrà cun il premi d'innovaziun dotà cun 3000 francs.